

# 福建通志

第肆拾伍冊

共壹百冊

福建金石志卷十二

石十一

宋七

王稼等鼓山題名

在閩縣

淳祐元年

清源王稼吳穩郡人陳無兢方遇林圓游明復董正李振祖遊鼓山淳祐初元九日

馮志云刻龍頭泉左王稼晉江人端平二年進士時知仙遊縣事李振祖字起翁閩縣人寶祐四年進士

陳略云王稼遊陳北溪之門

周自介等烏石山題名

在侯官

淳祐元年

周自介趙崇塲詹攀麟陳淳祖黃鎮周淳祐改元九日登道山

葉記云刻神光寺後宋詩紀事拾遺陳淳祖字道初温州瑞安人嘉熙二年進士知錢塘縣以治最聞厯知南康軍撫治有功景定二年知安



吉州召爲司農少卿

魏國表等武夷山題名

在崇安 淳祐元年

淳祐元年季秋月圓後二日清源魏國表會稽呂秉南偕山東彭永年雨中來

馮志云刻伏虎石

張正子等鼓山題名

在閩縣 淳祐二年

張正子趙崇蔭陳灼諸葛寅鄭輔周自介陳淳祖淳祐壬寅九日同遊鼓山靈源洞

葉記云正子閩縣人嘉定七年進士知靖州

顏頤仲等九日山題名

在南安 淳祐三年

太守貳卿顏頤仲禱回舶南風遵彝典也提舶寺丞劉克遜俱禱焉重司存也禮成飲福尙羊岳壑眞勝踐也別駕盧同父左翼權軍陳世才舶幙趙崇直邑令尹薛季良從與祠事也宗正徽猷趙師恕適拜開國命弗果

至也時淳祐癸卯孟夏乙丑也書者同父也

陳畧云攷元祐初詔市舶委逐處知州通判諸官同檢視故凡遣舶禱  
舶之役自刺史而下皆與祭真西山守泉先時商舶懼苛征和買之擾  
歲僅三四艘至西山革其弊於是年增三十六艘然則太守雖不兼舶  
權則重於提舶矣泉州市舶之設未詳何時閩王延彬刺泉每歲發舶  
無失者時謂之招寶侍郎則當在五代以前矣宋時置提舉一員元增  
其一又設同提舉各二員知事一員明設提舉副提舉吏目各一員正  
德後移於福州此題有曰舶幙趙崇孟攷宋時提舉之屬有監舶務幹  
辦公事等官見於省志而宋史未載所云舶幙當卽是矣願仲龍溪人  
劉克遜莆田人克莊弟同父侯官人陳世才無攷趙崇孟太宗子簡王  
裔見宋史宗室表孟音起字載玉篇薛季良興化人時宰南安趙師恕  
太祖子燕王裔亦見宗室表時知南外宗正司癸卯則理宗三年也

譌淳祐爲淳熙惟  
入閩通志不誤

張正子等鼓山題名

在閩縣

淳祐三年

郡人張正子東川姚希得金華潘晞夔萬安鄭新鄧峰高指泉山連端慤  
淳祐三年閏八月癸未遊靈源

馮志云隸書在靈源洞橋姚希得字逢源潼川人嘉定十六年進士時  
通判軍州事連端慤時任汀州軍判官

武夷精舍碑記

在崇安

淳祐四年

重修武夷精舍記

國初學校未立而四書院已興名卿賢相多出其中學之不可一日廢如  
此慶曆間詔州縣置學來遊日衆孔孟之後傳說四起盈目而不流塞耳  
而不決者歷千八百年周程張朱核而剔之尊本朝安中國爲功甚大士  
生是時始得其學而又得其所以學三代而下未有盛於此者也白鹿嶽  
麓東湖象山考亭建寧莫不有書院而武夷諸峯山水清美神仙之窟宅  
隱君子之盤旋作爲精舍昔者胡劉之問難朱子之講學諸生不遠千里



而聚首執簡以寫天地之秘以發鬼神之蹟皆在於此而大屏如故九曲  
猶存徒爲漁夫樵子之觀玩學而解散矣仁智有堂寒棲有館旣已荒苔  
宿草蔽蔭而蒙茸一言之教人誨於身者獨以爲萬世之所宗仰季子侍  
郎在冢孫郎中鑑動來學之思懷肯堂之念因精舍之舊葺治而廣大之  
士人熊蒙正樸茂而恬靜不妄納交因委其居守又詹樞好學而粹於文  
不苟於科第就命之講說崇安後進欣然從之遊前使者潘公友文彭公  
方撥公田以食之今大夫陳公樵子捐俸金植大其規模以養以誨寒暑  
不替遂命致錢酒以饋欲走山中以觀五曲之勝而未能也夫虹橋幔亭  
固騷人逸士之所動心而四經十傳志得意悟乃於山林有取焉何哉爵  
祿軒冕非謏聞臆見之能及游心於獨觀理於妙必有出於耳目思慮之  
表遂老矣不能起文公於旣往質平生之所疑願與里之後生誦詩讀書  
以博其所未至或者天子賜歸翺翔山中得以觀挹道德竊載而歸是非  
大夫崇尚之意歟精舍立於淳熙癸卯修於淳祐甲辰爲之者知縣陳君

樵子佐之者熊蒙正詹樞云

訪碑錄云王遂撰王鑑正書

葉記云董天工武彞山志云王遂字去非一字穎叔金壇人嘉泰二年進士淳祐三年爲建寧太守以文學政事著有遊武夷詩入爲御史累官至學士通志亦云王遂淳祐間以寶章閣學士知建寧考韓元吉初爲武彞精舍記稱淳熙十年元晦辭使節於江東遂賦祠官此碑係重修之作碑稱修於淳祐甲辰距淳熙癸卯六十年蓋朱子之季子侍郎在與家孫郎中鑑葺而廣之而遂爲作記今山志作重修武彞書院非也碑雖有白鹿嶽麓東湖象山考亭建寧莫不有書院之語而題作精舍者知沿舊稱不敢改也熊蒙正詹樞俱崇安人兩氏亦俱著姓多聞人書人王鑑無考余所見拓本剝蝕已甚因校錄原文以存之

清源山林爽壽字

在晉江

淳祐四年

宋淳祐甲辰立春日二山

壽

林爽奉親遊北山書于石

陳畧云右林爽所書壽字在碧霄岩巨石上山石犖确必艱緣迴磴始得一觀圖經謂字高二丈余嘗數至其下細度之亦僅可丈餘耳書法端正平直無側媚態石當岩峭風烈處故不易拓林爽時蓋爲晉江令謝奕正等鼓山題名

在閩縣

淳祐四年

淳祐甲辰暮春上澣天台謝奕正九華章時發清江張一鳴長沙王睿同遊鼓山觀靈源

陳畧云在靈源洞橋前文左行章時發曾知惠州

林躬行等九日山題名

在南安

淳祐四年

淳祐四年五月二十六日邑宰林躬行偕同僚周一舉鄭必得黃叔度趙崇遜飲懷古堂訪隱君遺跡陳憫以攝丞預翁元吉自山中約至矣皆宿雨開霽溪上增明足以助登覽之勝



陳畧云在西峯七人皆淳祐中宦於泉者然見於郡志者惟林躬行淳祐間爲南安令黃叔度爲宗學教授餘俱無攷矣趙崇遜太宗子漢王裔見宗室表別有安溪縣尉陳澗亦同時人當卽此攝丞之陳偁而志誤從水旁也

謝安之鼓山題名

在閩縣

淳祐四年

昭武謝安之體仁淳祐甲辰九月六日重遊靈源洞

楊選等鼓山題名

在閩縣

淳祐四年

淳祐甲辰重陽日郡別駕臨邛楊選約長樂黃師慤鄉僧德靜來遊鼓山之靈源洞男猷童孫嘉老侍行住山得融汲泉酌茗於此

馮志云在靈源菴前

趙成已等烏石山題名

在侯官

淳祐四年

趙成已克一唯伯穎叔淳祐甲辰日南至之九日同來

馮志云在霹靂巖旁小石

趙希道烏石山詩刻 全上

石中題歲月聊紀此時遊寄語岳頭老能無不朽不呈和尚禪師沐趙希道唯伯書

陳畧云行書詩中書此作也蓋變體也

林奭等九日山題名 在南安 淳祐四年

三山林奭君召與同郡林躬行得之周秉秀子立陳僩子寬南嶽趙楷端父慈谿朱正中叔大以淳祐甲辰游九前一日來游此山

陳畧云在東峯奭嘉熙二年進士時宰晉江 郡志誤云寶祐間任 游九即重九也

易水游至陸注云游再也左僖十三年杜注荐重也游與荐通以重九為游九前此未之見也

趙與鑄鼓山題名 在閩縣 淳祐四年

會稽趙與鑄齊賢偕弟與鑄德口淳祐甲辰口口十四日重遊鼓山靈

源洞



陳畧云與鑄與鐫爲燕王德昭九世孫

鼓山無名氏偈

在閩縣

淳祐四年

掀翻靈源洞打破石門關袖取白雲去天風吹下山咄住持融公不知箇甚麼宋淳祐木龍春仲望後一日待鶴山韓準登芳巖

陳畧云在靈源菴後木龍當是甲辰歲融公謂沙門德融也

宋詩紀事云準號鶴山詩林萬選有準詠九月梨花詩粉膩迷春月滿枝誤隨秋日弄芳菲料應潛作春宵夢剛被西風不放歸

宋朝請大夫林公宋偉墓志

在永福

淳祐四年

有宋提刑朝請大夫林公諱宋偉字力叟其先從固始入閩遂居永福之龍門曾祖覺民妣杜氏繼劉氏祖必先妣黃氏父仁澤贈奉議郎妣黃氏贈宜人君生於淳熙庚子十月丙申嘉定庚戌補入國學庚辰當就廷試丁父憂歸至癸未服闋對策賜第初調廣之德慶教尋改差江西帥屬因察院梁成大修大帥之怨罷君以撼帥已丑再調峽教中途改辟漢陽令

旋又改辟荆湖制屬明年有堂審之命遂除吏部掌故又明年除太學正  
未幾魏參政開督府辟置機幕督府罷還朝除大理司直兼沿江制司機  
幕未行改除廬陵倅明年就畀州麾已而又爲憲司售豪民猾吏之計奏  
罷已亥春朝廷復畀湖北運判督府隨軍轉運以老難於共力辭漕命遂  
歸里閏壬寅春廣東憲聯乏人朝命又俾持節以行是歲十月抵任淳祐  
癸卯二月得疾卒於官享年六十有四甲辰冬十一月己未葬於龍門東  
靈秀山之麓與皇考妣墳實相望焉君娶張氏封宜人男四人濤及季弟  
疇皆將仕郎鑄自廣東扶護至章貢以疾卒燾早世女二人長適經畧唐  
少卿之子夷仲次未笄孫男一人

永泰縣志云在三十二都蓮坑鄉按林裔分四支閩清兩支永福大埔  
西塘兩支均未識墓之所在光緒中葉於龍門半嶺田下發現一墳開  
視之銘石完好始修復焉

趙楷等清源山題名

在晉江

淳祐五年



南岳趙楷偕昭武朱正中東嘉許鈞金華沈驥滕士修三山王洧以淳祐乙巳春社日來遊

陳畧云清源之東麓曰龜巖繞磴而上半里爲獅巖未至數百武二石壁立中開一徑壁上刻石門蘭若四字大贏二尺旁款已泐下鐫趙楷題名正書如掌方正有法尋所謂蘭若者并基墟亦湮廢無存矣光緒戊寅秋暮黃敬堂學正邀爲龜巖之遊因與舍弟義門搜得是刻錄以歸他日當命工人拓之附近有清涼南吼四字在巨石上旁題大梁鄒式金爲□□題亦古刻惜無年代可考耳

李鏞鼓山題名

在閩縣

淳祐五年

眉山李鏞因祖考文簡公諱日挈二子洪樞過鼓山飯僧遊靈源洞徜徉一日而歸時淳祐五年二月庚午日題

馮志云刻靈源菴前李燾眉州人官敷文閣學士謚文簡

趙彥湄等鼓山題名

在閩縣

淳祐五年

稽陰趙彥湄濟川莆田蘇薦與遜夫延平謝華維岳淳祐乙巳後重陽一日遊於此

馮志云刻靈源菴前趙彥湄魏王延美第五子鄖國公六世孫

王子壽等鼓山題名

在閩縣 淳祐五年

建安王子壽莆僧汴氏子安行之永人

缺

廖孫伯安

缺

以淳祐乙巳重九

後一日同宏中守中口中口中遊

葉記云原刻喝水巖上後墜澗底

龍頭巖石刻

在順昌

龍頭巖

抑快軒文集云石宋廖懷英先生書其字廣徑周三尺凝重樸逸得鍾遺意先生順昌人淳祐間知建寧縣有遺愛子孫留家焉今五百年矣是刻在順昌水南龍頭巖通建寧孔道題款久泯道光七年先生裔孫建甯學生定掄館順昌數遊巖下愛是刻悵不得姓名召工刷泯款字



見愕且喜曰噫吾祖也乃搨而藏之

喻齋等鼓山題名

在閩縣

淳祐六年

嚴陵喻齋攜子慶孫遇通守真候館以淳祐丙午清明前三日偕道山徐泰叔來遊因遍覽奇勝恭讀西山先生文忠公詩倚暮而歸

陳畧云在喝水巖峭壁

應屋等鼓山題名

在閩縣

淳祐六年

天台應屋茂博建安劉煥文子莆陽林彬之元質以淳祐丙午寒食來遊馮志云刻龍頭泉石劉煥時任寧化縣事林彬之端平二年進士官福

建常平司幹官

劉偉甫壙誌

在莆田

淳祐六年

余長男將仕郎偉甫丰姿玉立機神□□有家庭之見聞無子弟之過失□□□□疾歿于京邸行路爲之隕涕□□□□父子乎自喪汝後生意索□□□□□割肺肝今夏聞汝柩橫爲□傷□□□□幾殆今猶

未愈力請得歸及□□□□汝葬巧女汝所鍾愛當爲□擇□□□□  
□□當選立堪爲汝嗣者□□□□□□怨靜□一房賴以扶持□前□  
□□□葬啟穴□潔謂天理全昧視此抔土歲月易得冤痛難平悲夫尙  
忍言之姑記歲月於坎當求汝後村伯父銘以示不朽以遂汝志其生以  
乙亥七月三十日申時死以甲辰六月二十五日戌時葬以丙午十一月  
十七日寅時淳祐六年劉克遜無競誌

莆陽金石初編云偉甫爲諸祖工部無競公長子以父任將仕郎入京  
銓試没于京邸後二年丙午葬延壽陳倉時文定公在朝與尤木石同  
領史職故封壙之夕工部公親書此志納之藏中併云當求伯父後村  
銘以遂汝志未幾文定公歸里始行補撰文載後村大全集卷百五十  
三按志稱將仕字少奇母宜人方氏生母孟氏娶朱繼顧巧女朱出也  
初偉甫葬朱氏于陳倉至是合祔工部求解溫陵郡紱歸營窆事皆壙  
志未及載葬未閱月工部公亦卒工部時以散大夫直秘閣主管崇禧



觀

方大琮墓誌銘 在莆田 淳祐七年

方氏自長官廷範始居莆六傳至福平長者祐析居後埭生隱君中隱君  
生萬登紹興庚辰第監行在和劑局和劑生達頓挫場屋中年三子玉立  
喜曰吾可以隱矣後以子貴累贈中奉大夫配碩人林氏公其仲子也諱  
大琮字德潤擢聞禧乙丑第詞賦爲南宮第三人授南劍州州學教授以  
郡先賢學術名節勵後進飾宮廟新器服上官送某士拒不納去爲江西  
漕幕平大鬪決險訟兩造皆伏時幕府多佳士公與故相文清李公今關  
學直翁徐公尤知名改秩知將樂縣公在郡泮已封崇羅先生墓至是式  
龜山廬偕其孫曾款謁松楸祀八賢于學務以禮遜迪民剽悍革心丁中  
奉公憂知永福縣適直兵飢守隘立柵禁港發廩日不暇給然延致士友  
講論文義亦不輟丁林碩人憂二邑皆止一考然有百年之思公自弱冠  
據高第著嫩譽人謂且立致貴顯而深自晦匿抑首常調比再服闋五十